



MOCIÓN SOBRE A RECUPERACIÓN DO PAZO DE MEIRÁS PARA O PATRIMONIO PÚBLICO DE GALICIA

Ante o debate suscitado pola recuperación do Pazo de Meirás, no concello coruñés de Sada, o Concello de Santiago, como capital de Galicia, non debería quedar á marxe e expresar de forma unánime a súa propia posición sobre o particular, motivo polo que o Grupo Municipal do Partido Popular, ao abeiro do Regulamento Orgánico Municipal, presenta, para a súa inclusión no Pleno, a seguinte MOCIÓN:

EXPOSICIÓN DE MOTIVOS

As Torres de Meirás, tamén coñecidas como o Pazo de Meirás, foron transmitidas gratuitamente en 1938 ao ditador Francisco Franco, quen as aceptou en plena Guerra Civil como “regalo” e para convertelas na súa residencia de verán.

Contradiciendo á propaganda oficial da época, a historiografía contemporánea ten atopado documentos que indican que a cesión de recursos e propiedades non foi o resultado da acción voluntaria da cidadanía da Coruña e da súa provincia, senón da presión de falanxistas e autoridades franquistas no contexto social daquela época.

Como resultado da forma xurídica de negocio privado e entre particulares coa que se materializou a adquisición por parte de Francisco Franco, na actualidade a propiedade permanece no patrimonio dos seus herdeiros.

Sen embargo, debido ao valor histórico e cultural das Torres de Meirás; ao seu elevado carácter simbólico; ao incumprimento da normativa de acceso aos BIC; ás circunstancias que fixeron posible a súa adquisición a título privado polo Xefe de Estado dunha Ditadura que durou 40 anos; así como a declarada intencionalidade de converter as visitas públicas ao Pazo nunha homenaxe á figura do ditador, fan necesario formular a incorporación das Torres de Meirás ao patrimonio público, sempre, como é lóxico, respectando a legalidade vixente.

Unha incorporación que podería materializarse máis sinxelamente, en primeiro lugar, se os titulares da propiedade fixesen algo tan simple como asumir os estándares actuais aplicados ás doazóns de bens ao Xefe de Estado de España ou a calquera outra autoridade pública: son inmediatamente incorporados ao patrimonio público.

Ante a proliferación de propostas que se están a expoñer, algunha delas caótica na súa formulación, sería preciso centrar a cuestión no estudo das formas xurídicas coas que materializar esta operación de recuperación do patrimonio público.


Estas son as razóns que explican a iniciativa que o Grupo Popular presenta para a súa consideración e apoio, se así se considera, dos distintos grupos municipais, concretada no seguinte

ACORDO

O Pleno do Concello de Santiago acorda:

1. Manifestar o rexeitamento e repulsa a calquera manifestación de apoio, xustificación ou enaltecemento do réxime franquista ou de calquera outro réxime ditatorial ou autoritario.
2. Facer unha condena pública, firme e rotunda, do uso do Pazo de Meirás por parte da Fundación Franco para facer apoloxía da ditadura e do ditador, e trasladarlle a máis enérxica repulsa polas súas declaracións de apoloxía do franquismo, manifestadas a través dun comunicado e por medio do seu portavoz.
3. Instar á Xunta de Galicia a que continúe coa esixencia á propiedade do Pazo de Meirás do réxime de visitas establecido na normativa vixente, aplicando, de ser necesario, coa máxima rigorosidade a normativa.
4. Instar á Xunta de Galicia a velar para que as visitas ao Pazo de Meirás non se utilicen para contar unha versión manipulada da historia e ofensiva para as vítimas do franquismo.
5. Instar á Xunta de Galicia a realizar un estudo xurídico, en colaboración coas Universidades Galegas, que analice a posibilidade de mecanismos que, respectando a legalidade vixente, permitan incorporar ao patrimonio público a propiedade das Torres de Meirás, tamén coñecidas como Pazo de Meirás, actualmente en mans de herdeiros legais de Francisco Franco, xefe do Estado español durante os 40 anos da Ditadura, e sen que a dita incorporación ao Patrimonio Público implique un novo custo para o pobo de Galicia, que xa o asumiu no ano 1938.

Santiago de Compostela, 15 de setembro de 2017.



Agustín Hernández
Portavoz do Grupo Municipal do Partido Popular